


佛藏經

第三

二百六  
念三

48920





佛藏經卷第三

姚秦三藏法師鳩摩羅什譯

淨法品第六

佛告舍利弗昔迦葉佛預記我言釋迦牟尼  
佛多受供養故法當疾滅舍利弗我法實以  
多供養故後當疾滅舍利弗譬如其人得大  
寶藏心則大樂如是舍利弗未來世中多有  
比丘親近白衣受其供養漸相狎習而與執  
事心便歡喜以為悅樂猶如貧人得大寶藏  
如是癡人貴於世利世樂奴僕若見比丘多  
人供養心便謂之得阿羅漢見少欲知識便  
謂愚人如是比丘為利養故捨無上錦裘隨



所樂者即成其事舍利弗如來於今爲是癡  
人說如是等經何以故破戒比丘聞說是經  
則生悔心當還持戒不作大賊受他供養舍  
利弗若有比丘得聞是經心不清淨不喜不  
樂是則名爲弊惡比丘何以故舍利弗淨戒  
比丘無法不樂若說布施若說持戒若說忍  
辱若說精進若說禪定若說智慧若說如是  
厭畏經法心皆喜樂舍利弗有三種人聞說  
是經心則憂悔何等爲三一者破戒比丘二  
者增上慢人三者不淨說法復有三種人聞  
如是經心則憂惱何等爲三一者人見二者  
命見三者我見舍利弗我今明了告汝汝好



善知識以慈愍心爲人求利求樂求安隱汝  
等一心聽受我語常求善利心勿放逸舍利  
弗不淨說法者有五過失何等爲五一者自  
言盡知佛法二者說佛經時出諸經中相違  
過失三者於諸法中心疑不信四者自以所  
知非他經法五者以利養故爲人說法舍利  
弗如是說者我說此人當墮地獄不至涅槃  
復次舍利弗說法比丘處在大衆信樂法者  
爲敷高座捨佛正法而說外道嚴飾文辭我  
久勤苦求是法寶而此惡人捨置不說但以  
經中相違語義互相是非不順正法於聖法  
中高心自大隨意而說爲求利養舍利弗若

比丘說法雜外道義有善比丘勤求道者應  
從座去何以故舍利弗有信白衣敷置高座  
不應演說外道諸義若不去者非善比丘亦  
復不名隨佛教者舍利弗說法甚難如是說  
者我說此人名爲外道且捷弟子非佛弟子  
是說法者命終之後當生且捷子道何等是  
且捷子道邪見是且捷子道何等爲邪見謂  
是地獄畜生餓鬼何以故舍利弗身未證法  
而在高座身自不知而教人者法墮地獄舍  
利弗如是因緣如來悉知我諸弟子以種種  
門種種因緣種種諸見滅我正法舍利弗若  
有衆生聞如是經第一義空無所有法心歡



喜者當知是人真我弟子舍利弗過去世有  
五百盲人行於道路到一大城飢渴乏極令  
一盲人在外守物餘者入城乞索飲食未久  
之間有一誑人至守物者所語言咄人何以  
獨住答言我有多伴入城乞食誑人語言汝  
爲知不彼間大施衣食瓔珞華香雜物隨意  
可得汝若須者將汝詣彼答言可今誑人將  
盲小離本處盡奪其物諸盲乞食得已而還  
誑人復語諸盲人言汝等得值大會施不答  
言不值誑人語言汝等所得物可置於此我  
將汝等詣大施會諸盲盡共留物一處隨誑  
人去誑人盡將五百盲人臨大深坑而語之

言此地平好有大施會汝等各可迴面東行  
受大施物即便一時墮坑而死舍利弗當來  
比丘好讀外經當說法時在校文辭令衆歡  
樂惡魔亦時助惑衆人障礙善法若有貪著  
音聲語言巧飾文辭若復有人好讀外道經  
者魔皆迷惑令心安隱若有比丘修佛法者  
令生疑惑咸使衆人不復供養或有比丘若  
二若三已讀佛經便使令求外道經法先自  
看者讚言善好是諸人等為魔所惑覆障慧  
眼深貪利養看諸外書猶如群盲為誑所欺  
皆使令墮深坑而死舍利弗諸生盲人即是  
比丘捨佛無上道求外道經書誑人是惡魔



深坑是邪道舍利弗如群盲人捨所得物欲  
詣大施而墮深坑我諸弟子亦復如是捨鹿  
衣食而逐大施求好供養以世利故失大智  
慧而墮深坑阿鼻地獄復次舍利弗不淨說  
法者不知如來隨宜意趣自不善解而爲他  
說是人現世得五過失餘人不知惟得天眼  
比丘及諸天所知何等爲五一說法時心懷  
怖畏恐人難我二內懷憂怖而外爲他說三  
是凡夫無有真智四所說不淨但有言辭五  
言無次第處處抄撮是故在衆心懷恐怖如  
是凡夫無有智慧心無決定但以憍慢微小  
因緣求於名聞疑悔在心而爲他說是人長

夜自受貪欲瞋恚愚癡毒箭何以故舍利弗  
是人不能定知諸法而為他說心不喜樂或  
若違失舍利弗我知不淨說法有此過咎不  
得正道是事一切比丘不知諸天不知惟我  
乃知復有不淨說法比丘不解如來隨宜所  
說而為他人說諸經中無我無人無衆生無

壽命而是人自以論辭說言有我有人有衆生  
有壽命即為謗佛謗法謗僧謗三寶罪諸天世  
人所不能知惟佛乃知舍利弗是人亦名不  
淨說法我知其過諸神通者及諸天衆皆不  
能知惟佛乃知舍利弗我今為汝譬喻解說  
若人不知佛道義相而為他人不淨說法此



人成就幾不善事舍利弗於意云何闍浮提  
衆生寧為多不甚多世尊舍利弗若有惡人  
盡奪其命是人得罪寧為多不甚多世尊如  
是癡人不知佛道而為他人不淨說法罪多  
於此何以故是人不淨說法破無上佛道亦  
謗過去未來今佛何以故舍利弗若有過去  
諸佛說一切法皆畢竟空無我無人無衆生  
無壽者無命者舍利弗未來諸佛說一切法  
亦畢竟空無我無人無衆生無壽者無命者  
舍利弗今現在十方恒沙世界諸佛說一切  
法亦畢竟空無我無人無衆生無壽者無命  
者舍利弗是名諸佛無上之法謂一切法無

有體性無所得空本性寂滅無生無滅無有  
性相自相皆空如來但為斷諸憶想分別故  
說而諸佛菩提無有分別舍利弗何等為分  
別謂分別者我見人見衆生見壽見命見斷  
見常見凡夫成就是諸分別若人無有如是  
分別能悉了知一切法空無我無人無衆生  
無壽者無命者如是念時心得歡喜聞第一  
義空不驚不畏是人則知五陰虛妄無有真  
實知十二入十八界虛妄無有真實是人亦  
不分別涅槃不念涅槃不言我能念涅槃以  
法得寂滅而不分別是法所寂滅處亦不分  
別亦復不得舍利弗是名順忍是以於是順



忍第一義中亦不得自相舍利弗何等是順  
忍相所謂無相是順忍相舍利弗於意云何  
若人於此順忍尚不得相是人若得我相人  
相衆生相壽相命相者無有是處若人成就  
如是智慧應受供養是名佛子是名入不住  
定舍利弗是名佛法第一義門謂無憶想分  
別無此無彼而是癡人在大衆中說於邪見  
自以憶想分別教人此是佛法此是聖道如  
是癡人則為誹謗過去未來現在諸佛如是  
癡人名惡知識不名善知識舍利弗怨雖奪  
命但失一身如是癡人不淨說法千万億劫  
為諸衆生作大衰惱是人癡冥覆佛善提本

心貪著還復熾盛相續不斷以貪著故往來  
五道無善逕路生死不絕是故舍利弗不淨  
說法者得罪極多亦為衆生作惡知識亦謗  
過去未來今佛舍利弗置此閻浮提衆生若  
人悉奪三千大千世界衆生令不淨說法罪  
多於此何以故是人皆破諸佛阿耨多羅三  
藐三菩提為助魔事亦使衆生於百千萬世  
受諸衰惱但能作縛不能令解當知是人於  
諸衆生為惡知識為是妄語於大衆中謗毀  
諸佛以是因緣墮大地獄教多衆生以邪見  
事是故名為惡邪見者舍利弗我見人見衆  
生見者多墮邪見斷滅見者多疾得道何以



故是易捨故是故當知是人寧自以利刀割  
舌不應衆中不淨說法

往古品第七

佛告舍利弗過去久遠無量無邊不可思議  
阿僧祇劫尔時有佛号大莊嚴如來應供正  
遍知明行足善逝世間解無上士調御丈夫

天人師佛世尊其佛壽命六十八百萬億那由  
有六十八百萬億大弟子衆其佛滅後舍利  
流布如我滅後無有異也正法住世亦五百歲  
如我滅後無有異也其佛滅後大弟子衆於  
中一日有百比丘入涅槃者二百三百四百  
五百入涅槃者一日之中或有才方億比丘

入涅槃者如是展轉其佛所有多知多識大神  
通衆三月之中皆入涅槃舍利弗大莊嚴佛  
正法流布多諸天人所共供養舍利弗大莊  
嚴佛及大弟子滅度之後漸多有人知沙門  
法安隱快樂出家學道而不能知佛所演說  
甚深諸經無等空義多為惡魔之所迷惑時  
說法者心不決定說不清淨說有我人衆生  
壽命不說一切諸法空寂其佛滅度百歲之  
後諸弟子衆分爲五部一名普事二名苦岸  
三名薩和多四名將去五名跋難陀舍利弗  
此普事比丘苦岸比丘薩和多比丘將去比  
丘跋難陀比丘是五比丘為大衆師其普事



者知佛所說真實空義無所得法餘四比丘  
皆墮邪道多說有我多說有人舍利弗普事  
比丘為四部所輕無有勢力多人惡賤四惡  
比丘多教人眾以邪見道於佛法中不相恭  
敬相違逆故以滅佛法舍利弗若有人知普  
事比丘所說空法信受不逆我知此人曾於  
先世供養五千佛有六十八億那由他人已  
入涅槃何以故舍利弗是人於過去世諸佛所  
種諸善根修集無所得空法應入涅槃舍利  
弗是苦岸比丘一切有比丘將去比丘跋難  
陀比丘皆計有所得說有我人眾生命徒  
眾熾盛是四惡人多今在家出家住於邪見

捨第一義無所有畢竟空法貪樂外道屈撻  
子論舍利弗是四惡人所有在家出家弟子  
常相隨逐乃至法盡舍利弗是中有人知非  
法事受以爲法勤心行之猶尚不得順忍況  
得須陀洹果是人猶尚不作消供養事何況  
能生順忍舍利弗亦時在家出家弟子多墮  
惡道不至善道是諸惡人滅佛正法亦與多  
人大衰惱事又是惡人命終之後當墮阿鼻  
地獄仰卧九百万億歲伏卧九百万億歲左  
脇卧九百万億歲右脇卧九百万億歲於熱  
鐵上燒燃焦爛是中退死更生炙地獄大炙  
地獄活地獄黑繩地獄皆如上歲數受諸苦



惱於黑繩地獄死還生阿鼻大地獄中舍利  
弗以是因緣若在家出家親近此人及善知  
識并諸檀越凡有六百四万億人與此四師  
俱生俱死在大地獄受諸燒煮如是舍利弗  
是人所有善知識家諸檀越家弟子諸師隨  
順行者凡在其數皆生地獄舍利弗汝等不  
能知其多少惟有如來乃能知之與此惡人  
墮大地獄俱生俱死凡有六十四百万億人  
如是展轉一劫受苦大劫將燒故在地獄何  
以故舍利弗破諸如來阿耨多羅三藐三菩  
提其罪甚重不爲輕也大劫若燒是四惡人  
及六百四万億人從此阿鼻大地獄中轉生

他方在大地獄何以故舍利弗重罪具足其  
報不少在於他方無數百千萬億那由他歲  
受大苦惱世界還生是四罪人及六百四萬  
億那由他人并及餘人罪未畢竟於彼命終  
還生此間大地獄中舍利弗是四罪人及六  
百四萬億衆生久久雖免地獄苦惱得生人  
中於五百世從生而盲然後得值一切明佛  
如來應供正遍知明行足善逝世間解無上  
士調御丈夫天人師佛世尊舍利弗一切明  
佛聲聞弟子一億那由他尔時人民身長三  
百九十六肘時佛身一倍常光圓照十萬億由  
旬舍利弗是人於一切明佛法中出家十方



億歲勤行精進如救頭然不得順忍況得道  
果何以故舍利弗起破阿耨多羅三藐三菩  
提罪業因緣法應當尔命終之後還生阿鼻  
大地獄中以先起重不善業緣舍利弗是諸  
人等如是展轉乃至我今於其中間得值九  
十九億佛於諸佛所不得順忍何以故佛說  
深經是人不信破壞違逆謗毀賢聖持戒比  
丘出其過惡起破法業因緣法當應尔舍利  
弗汝且觀之誹謗聖人不信聖語受是無量  
無邊苦惱不得解脫舍利弗有諸衆生起破  
法罪業違逆不信者其數無量於九十九億  
佛所阿僧祇劫乃至無一人入涅槃者舍利

弗誰能破諸佛教不信違逆但凡夫愚癡及  
增上慢諸惡比丘并諸不淨說法比丘何以  
故舍利弗是三種人不名行者不名得者是  
人不信如來法故毀謗違逆舍利弗汝謂何  
者是苦岸比丘不淨說法者即調達癡人是  
汝謂何者是一切有比丘不淨說法者即拘  
迦離比丘是舍利弗汝謂何者是將去比丘  
不淨說法者即迦毗羅比丘是汝謂何者是  
跋難陀比丘不淨說法者即裸形沙門婆利  
摩陀是舍利弗汝謂今時清淨如實說諸佛  
菩提利益無量衆生者即是富樓那弥多羅  
居士所說清淨諸隨學者得值五千佛有六



十八億那由他人皆已滅度舍利弗若人實語  
何者爲是最上法師決了法義清淨說法當  
說富樓那弥多羅尼子是舍利弗富樓那定  
心決了所說無難無有所疑而生論議舍利  
弗若人實語何者是一切因緣法師當說富  
樓那是舍利弗富樓那世世所生常爲衆生  
而作佛事於九十億諸佛法中常作法師清  
淨說法皆於諸佛所盡其形壽常修梵行清  
淨說法舍利弗富樓那亦於七佛法中而作  
法師亦於我法中作大法師成阿羅漢心得  
解脫若人實說何人世世供養諸佛種諸善  
根當說富樓那是舍利弗富樓那於九十億

諸佛法中勤心求學決定議論有深智慧是  
故如來於諸法師說為第一舍利弗若我一  
日一夜稱說富樓那功德不盡若過一日一  
夜亦復不盡何以故富樓那法施無俗因緣  
不貪利養富樓那法師得四無礙智惟除如  
來諸世界中言辭義理無能勝者舍利弗我  
今告汝若人欲得阿耨多羅三藐三菩提為  
人說法則得無量無邊福德亦能利益無量  
衆生舍利弗若人破壞違逆不信是法者則  
起無量重罪因緣何以故舍利弗惡有惡報  
善有善報我以此故今以是經囑累於汝當  
為四衆廣說分明舍利弗若聞是經心信歡



喜即得無量無邊福德若聞不信心不喜樂  
即得無量無邊重罪舍利弗當知是人名爲  
破戒比丘若增上慢不淨說法者舍利弗若  
人違逆如是教者世世所生常盲無目舍利  
弗我今明了告汝我今所說非如陶師愛護  
坏器我今分明廣爲四衆說第一義界竟空

法堅固者在不堅固者破何以故舍利弗  
得阿耨多羅三藐三菩提不爲邪見惡人說  
法不爲我見人見衆生見壽命見者說法何  
以故是諸貪著皆名邪見舍利弗如是我見  
人見不得順忍況得道果舍利弗若我見人  
見衆生見壽命見斷見常見者能得順忍能

得道果無有是處是故舍利弗若人成就如  
是見者於我法中我則不聽受諸供養是非  
行者亦非得者但於我法求自活命舍利弗  
我說外道欲入佛法應試四月何以故諸外  
道人多有我見人見衆生見壽命見斷見常  
見舍利弗我諸弟子無有我見人見衆生見  
壽命見斷見常見我諸弟子但說空無相無  
願無所得忍說識無所住舍利弗若有成就  
如是忍者我聽是人出家受戒得受供養衣  
服飲食卧具醫藥若人無是忍者應先試之  
先教今住諸法無我舍利弗若於此忍心不  
歡喜聞說第一義空驚疑譏呵聞說我見心



則歡喜當知是人爲魔所使若先外道舍利  
弗智者於此不應生憂但於此人應生悲心  
何以故舍利弗若人成就如是惡者所獲惡  
報說不可盡當於此人生利益心教以諸法  
無我諸法空寂諸法無作無有受者是人若  
愛佛法得聞是事心喜樂者其餘空行比丘  
無所得者皆應示教利喜安慰其心爲說諸  
法無所有空若聞驚畏應於衆中語其和尚  
阿闍梨如經中說行空行者有能了知諸法  
別相我與爲師不與我見人見顛倒邪見貪  
著持戒者爲師如來聽許具正見者而共布  
薩不聽破戒邪見之人破威儀者而共布薩

長老弟子聞說空寂無所有法心不信樂志  
在外道佛不聽與外道布薩是人若當不捨  
是見不應聽使得入僧事亦不受其欲如是  
作已猶故不捨當知是人不得在道便是永  
棄應語其和尚阿闍梨不應復畜舍利弗若  
僧如是則供養我亦為善破外道邪見是名  
清淨說戒布薩舍利弗我今明了告汝若人  
受是我見人見衆生見有無見是人不名供  
養於我不名隨我出家受戒是名隨逐六師  
出家以六師為師舍利弗若人於是清淨實  
法不能得忍而受供養是人所得則為邪受  
舍利弗是人雖於我法中出家護持淨戒而



於第一義空無所得法心不信解驚怖疑悔  
當知是人但貴持戒多聞禪定舍利弗是人  
不名供養恭敬尊重於我何以故舍利弗無  
始世來無有衆生不得四禪若但知得四禪  
謂爲沙門利者是人何名供養於我是故舍  
利弗我今明了告汝當來世人於我法中種種  
貪著種種邪見毀壞我法舍利弗若人但貴持  
戒多聞禪定當知是人不能淨行沙門諸法  
我則不說此人名爲沙門婆羅門舍利弗若  
人於一切法無我如實知見無我一切法本  
來無所有空能如實知無所有空是則不以  
持戒爲上多聞爲上禪定爲上何以故舍利

弗諸法實相無生無起於中無法可爲上者  
舍利弗是諸法如實中無持戒者無破戒者  
何況貪著而以爲上舍利弗是名諸佛阿耨  
多羅三藐三菩提謂一切法無相自相空無  
我無人若有是忍是名行者是名得者是人  
名爲以信出家應受供養清淨布薩是人則爲人  
中之天舍利弗諸佛阿耨多羅三藐三菩提  
惟是一義所謂離也何等爲離離諸欲諸見  
欲者即是無明見者即是憶念何以故一切  
諸法憶念爲本所有念相即爲是見見即是  
邪舍利弗善法中見我亦說之名爲邪見何  
以故舍利弗離欲寂滅中無法無非法無善



無惡是事皆空遠離諸結一切憶念是故名  
離舍利弗無上道中諸欲永息何等諸欲謂  
邪不善念若我若我所作相事相是名阿耨  
多羅三藐三菩提中諸欲永息

淨見品第八

佛告舍利弗我念過世求阿耨多羅三藐三  
菩提值三十億佛皆号釋迦牟尼我時皆作  
轉輪聖王盡形供養及諸弟子衣服飲食卧  
具醫藥為求阿耨多羅三藐三菩提而是諸  
佛不記我言汝於來世當得作佛何以故以  
我有所得故舍利弗我念過世得值八千佛  
皆号定光我時皆作轉輪聖王盡形供養及

諸弟子衣服飲食卧具醫藥為求阿耨多羅三藐三菩提而是諸佛皆不記我汝於來世當得作佛何以故以我有所得故舍利弗我念過世值六万佛皆号光明我時皆作轉輪聖王盡形供養及諸弟子衣服飲食卧具醫藥為求阿耨多羅三藐三菩提而是諸佛亦不記我汝於來世當得作佛何以故以我有所得故舍利弗我念過世值三億佛皆号弗沙我時皆作轉輪聖王四事供養皆不記我有所得故舍利弗我念過世得值万八千佛皆号山王劫名上八我皆於此万八千佛所剃髮法衣修習阿耨多羅三藐三菩提皆不



記我以有所得故舍利弗我念過世得值五百佛皆号華上我時皆作轉輪聖王悉以一切供養諸佛及諸弟子皆不記我以有所得故舍利弗我念過世得值五百佛皆号威德我悉供養皆不記我以有所得故舍利弗我念過世得值三千佛皆号憍陳如我時皆作轉輪聖王悉以一切供具供養諸佛皆不記我以有所得故舍利弗我念過世得值九千佛皆号迦葉我以四事供養諸佛及弟子衆皆不記我以有所得故舍利弗我念過去於万劫中無有佛出今時初五百劫有九万辟支佛我盡形壽悉皆供養衣服飲食卧具醫藥尊

重讚歎次五百劫復以四事供養八万四千億  
諸辟支佛尊重讚歎舍利弗過是千劫已無  
復辟支佛我時閻浮提死生梵世中作大梵  
王如是展轉五百劫中常生梵世作大梵王  
不生閻浮提過是五百劫已下生閻浮提治  
化閻浮提命終生四天王天於中命終生忉  
利天作釋提桓因如是展轉滿五百劫生閻  
浮提滿五百劫生於梵世作大梵王舍利弗  
我於九千劫中但生閻浮提九千劫中但生  
天上劫盡燒時生光音天世界成已還生梵  
世九千劫中都不生人中舍利弗是九千劫  
無有諸佛辟支佛多諸衆生墮在惡道舍利



弗是万劫過已有佛出世号普守如來應供  
正遍知明行足善逝世間解無上士調御丈  
夫天人師佛世尊我於尔時梵世命終生閻  
浮提作轉輪聖王号曰共天人壽九万歲我  
盡形壽以一切樂具供養彼佛及九十億比  
丘於九万歲為求阿耨多羅三藐三菩提是  
普守佛亦不記我汝於來世當得作佛何以  
故我於尔時不能通達諸法實相貪著計我  
有所得見舍利弗於是劫中有百佛出名号  
各異我時皆作轉輪聖王盡形供養及諸弟  
子為求阿耨多羅三藐三菩提而是諸佛亦  
不記我汝於來世當得作佛以有所得故舍

舍利弗我念過世第七百阿僧祇劫中得值千  
佛皆号閻浮檀我盡形壽四事供養亦不記  
我以有所得故舍利弗我念過世亦於第七  
百阿僧祇劫中得值六百二十萬諸佛皆号  
見一切義我時皆作轉輪聖王以一切樂具  
盡形供養及諸弟子亦不記我以有所得故  
舍利弗我念過世亦於第七百阿僧祇劫中  
得值八十四佛皆号帝相我時皆作轉輪聖  
王以一切樂具盡形供養及諸弟子亦不記  
我以有所得故舍利弗我念過世亦於第七  
百阿僧祇劫中得值十五佛皆号曰明我時  
皆作轉輪聖王以一切樂具盡形供養及諸



弟子亦不記我以有所得故舍利弗我念過  
世亦於第七百阿僧祇劫中得值六十二佛  
皆号善寂我時皆作轉輪聖王以一切樂具  
盡形供養亦不記我以有所得故如是展轉  
乃至見錠光佛乃得無生忍即記我言汝於  
來世過阿僧祇劫當得作佛号釋迦牟尼如  
來應正遍知明行足善逝世間解無上士調  
御丈夫天人師佛世尊舍利弗我念過世有  
十二億轉輪聖王皆字頂生又舍利弗我念  
過世有三十億轉輪聖王皆名摩訶刪摩陀那  
舍利弗我念過世曾見四十億轉輪聖王皆  
字摩訶提婆舍利弗我念過世有一億轉輪

聖王皆字億螺

誨媯反

舍利弗我念過世有十

萬轉輪聖王皆字稱尾

覓視反

舍利弗我念過世

有一萬轉輪聖王皆字照明舍利弗我念過世

有二萬轉輪聖王名字各異舍利弗我念過

世有十六億轉輪聖王名字各異是諸王等

我於餘處爲阿難說舍利弗於意云何汝謂

是諸王者豈異人乎即我身是舍利弗我念

過去時世有佛号曰善明弥勒菩薩時作轉

輪聖王字曰照明初發阿耨多羅三藐三菩

提心於時衆生壽八万四千歲其善明佛三

會說法初會九十六億人一時得道第二大

會九十四億人一時得道第三大會九十四



億人一時得道時王見佛三會說法度人無  
量心大歡喜即於萬歲一切供養佛及弟子  
發心求阿耨多羅三藐三菩提於未來世衆  
生易度我當成佛壽命限量比丘僧數圍繞  
如是舍利弗我知是事過此無量舍利弗弥  
勒發心四十劫已我乃發心無勝佛所初種  
善根我於千歲一切樂具供養是佛五百瓊  
疊而以奉上是佛滅後起七寶塔高一由旬  
縱廣半由旬皆以金銀瑠璃玻瓈磈磈瑪瑙  
赤真珠所成心常發願衆生苦惱無救度者  
遭值惡法多墮惡趣我於今時當成佛道舍  
利弗汝且觀之阿耨多羅三藐三菩提甚難

修習舍利弗我修習阿耨多羅三藐三菩提  
無央數世受諸苦惱我若說者汝聞愁悶我  
諸所受勤苦憂惱皆爲求阿耨多羅三藐三  
菩提舍利弗汝觀薩和檀菩薩求善法菩薩  
常悲菩薩不放棄菩薩常精進菩薩供養若  
干諸佛受諸苦惱猶尚難得阿耨多羅三藐

三菩提何況是諸癡人乃無一念爲求涅槃  
舍利弗如是行者猶尚甚難況不行者是故  
舍利弗我今明了告汝以下法者不得上法  
用上法者乃得上法何等下法謂身惡業口  
惡業意惡業下法名爲不能勤心修習善法  
下法名爲懈怠懶惰破所受戒舍利弗是名



下中下者又下中下者於我法中出家生有  
所得見我見人見衆生見何以故舍利弗如  
來於此了了見知有所得者乃無順忍況得  
道果舍利弗若有所得者百千万億諸佛以  
三輪示現是人若當不捨是見尚不消人一  
口飲食況得道果舍利弗我見人見得涅槃  
者一切凡夫皆應滅度何以故我見人見衆  
是邪見諸凡夫人多貪著我我所見人見衆  
生見是故一切凡夫應得涅槃舍利弗若人  
作念有我是人若當不捨是見得入涅  
槃一切凡夫應得聖道何以故一切凡夫皆  
是我見人見是故我見人見入涅槃者一切

凡夫皆入聖道於聖道中則無所少舍利  
若人作念有我見者則有涅槃是人即是聖  
道不須餘念何以故一切凡夫我見人見無  
所少故如是癡人有是過失謂諸凡夫皆入  
聖道聖道無繫是人修時應當殺生受諸五  
欲起五逆罪是故癡人於聖道中有五逆罪  
何以故一切凡夫皆說有我有衆生故若又  
作如是言成就五逆罪者不入涅槃說我人  
者得入涅槃即是妄語亦是謗佛於我法中  
又不能得清淨出家舍利弗我今明了告汝  
有所得者無有涅槃有所得者若有涅槃是  
則諸佛不出於世一切凡夫皆入涅槃何以



故一切凡夫皆有我見人見皆有所得皆是  
邪見舍利弗汝且觀我幾時成就有所得見  
非賢聖行諸佛不與我受記言汝於來世當  
得作佛舍利弗我如是行猶不得記況是癡  
人但以持戒多聞禪定等生我見人見衆生  
見舍利弗我說此人无名行者无名得者何  
以故舍利弗長夜貪著如是邪見不得滅度  
故如是癡人不作是念我等何不試行修習  
無我人法我等或得斷衆苦聚舍利弗譬如  
從生盲人走避惡狗墮深大坑舍利弗我謂  
癡人如是修習我見人見有所得見以是諸  
見欲望清淨是人隨所貪著即以是事欲得

涅槃我說是人當墮惡道舍利弗譬如盲人  
於深大坑生安隱心如癡人於我人見有  
所得見生安隱心是人長夜隨所著者為之  
欺誑還著是事於我法中而受供養如是癡  
人長夜哀惱墮惡道中舍利弗譬如大灌頂  
王自於所治國中威勢自在是人應奪是人  
應驅若諸民衆不順王意說王過惡沮壞人  
心不能護城謀欲反叛王知是人為是大賊  
於大眾中打惡聲鼓苦治其罪驅擯令出以  
其不能盡忠護城得是苦惱舍利弗佛亦如  
是於無量劫修集阿耨多羅三藐三菩提為  
大法王於法國土有大威力諸弟子中有知



法味乃至失命不毀我教諸天世人無能壞者所受教中自不惡逆亦不教他我於衆中有大威力自在立教爲護法城不使惡賊毀壞得入竊受如來所說密法向諸怨賊邪見者說舍利弗如來現在善護法城四大弟子智慧深遠令我法城不懼破壞若與法城作

障礙者爲是大賊毀壞法城盜我密法向於道說是人常來至於我所我與共語亦其教法不說密要是人爲求所示教法出家受戒我知此人後應得道聽使出家四月中試何以故爲護法城故又使未來世賊不更起故如是如來善護法城使不得便所謂今受佛

教捨本惡耶諸比丘衆皆應歡喜聽使出家  
得受戒已天人世間不能轉動舍利弗何等  
是可試者謂外道人及樂外道法者舍利弗  
何等是樂外道法所謂有所得者我見人見  
者衆生見者貪著邪者於自相空法中心生  
疑者受行種種邪虛妄法不能入於第一義  
空行諸邪道其人名爲樂外道法舍利弗不  
可試以種種色衣若白衣人若著袈裟有如  
是不善有所得見皆名外道於我法中出家  
受戒是人應試何以故有所得者於我法中  
即是邪見是名大賊一切世間天人中賊是  
名一切世間怨家諸佛大賊舍利弗是邪見



人我則不聽出家受戒舍利弗一切法空無我無人無  
若人於中不能生忍一切法空無我無人無  
衆生無壽命不能信解於我法中所受供養  
名爲不淨是人則是不供養佛不供養法不  
供養僧強入我法形是沙門心是外道爲盜  
法人舍利弗於未來世當有比丘不修身不  
修戒不修心不修慧是人輕笑如來所說如  
來所行如來常於第一義空恭敬供養常樂  
是行是諸比丘輕笑如來所行真際畢竟  
空法舍利弗爾時若有苦行比丘亦共輕笑  
令我弟子有行空者我讚其善安慰其心爾時  
是人輕笑行空但求不牢堅事以有賊及有諸

法如是等事令衆心喜。若說一切法空者，亦輕是人，何以故？舍利弗法應尔也。衆生善根欲斷本相，則現真實妙法，在於世間無有受者。譬如癡人以旃檀香同於猥木，舍利弗迦葉佛說未來世中，釋迦牟尼佛諸弟子衆，以利養故爲諸白衣說第一義空。尔時多有在家出家愚癡，不受違逆不信，而反誹謗失於大利。以是因緣，當墮惡道。舍利弗尔時多有相違諍論，我論人論衆生論壽者論命者論善法欲少，但樂利養實是愚癡。自謂有智互相違逆，常共諍訟，樂有斷事，生怨嫉心。是人捨沙門法，但求利養多樂事務所營，非一。



常樂伺求他人長短自隱其過稱說功德如  
 今比丘覆藏功德自出過惡當余之時咸共  
 不能護持重戒無所曉故破於義利而言諸  
 法空自相空何所能作如那羅戲人種種變  
 現無所知者見之大笑何以故不解戲法其  
 術隱故生希有心驚恠大笑如是舍利弗余  
 時真實比丘說空寂法求活命者咸共嗤笑  
 何以故是人不知佛法義故聞說空法驚疑  
 怖畏舍利弗汝觀此人於安隱處生衰惱心於  
 衰惱處生安隱心是人顛倒逆行善法順行惡  
 法舍利弗如是癡人多懷慳貪瞋恚愚癡具  
 行三不善根舍利弗我為利益持戒比丘故

說二百五十戒經如是癡人乃以世間小因緣故向在家者說乃至書寫以示白衣舍利弗如是癡人說言諸法空自相空何所能作何以故如是癡人尚不能除慳貪煩惱何況能斷無明舍利弗尔時持律比丘不能善學諸說法者亦不善學讚修多羅者亦不善學舍利弗云何名爲持律比丘不能善學如來經中說有三學善戒學善心學善慧學是人於三學中不能善學但以多聞因緣輕慢他人是人則爲障礙善法如是癡人猶尚不能如法答問況於畢竟空無所有中能發精進舍利弗尔時破戒比丘樂爲白衣執事宣通



使命療治病法以自生活舍利弗汝今觀此  
惡人於我法中出家受戒得受供養而反以  
我爲怨舍利弗尔時四天王釋提桓因大梵  
天王乃至百千萬億諸天見我法中如是毀  
壞皆大憂愁啼泣涕零舍利弗是實不應依  
止於我而爲白衣營執事務何以故釋迦  
牟尼佛弟子乃至諸天龍神猶尚不應爲作給  
使諸天龍神於我弟子與作給使如是癡人  
所親近白衣若能修習通達諸法第一義空  
無有是處舍利弗尔時破戒比丘乃至爲得  
大杯酒故與諸白衣演說佛法於意云何多  
貪恚癡多樂讀經貪外經利行不清淨是人

能得信解無所有畢竟空法能得具足沙門  
果不不也出尊舍利弗若有比丘趣得衣服  
飲食卧具醫藥持戒清淨不樂憤鬧散亂語  
言不貪外義晝夜精勤如救頭然一心勤行  
入直聖道是人於空無所得法尚難通達況  
是癡人無有深欲無有信解舍利弗汝觀是  
人不知如來無上義故破我正法自爲己身  
及爲他人作大衰惱如是大賊世間怨家此  
經中說應當遠離是人於佛尚不知恩自念  
我等所爲出家於此法中不應行處則不應  
行是故舍利弗如來欲使未來世中止此惡  
故說如是經若有比丘破所受戒毀破威儀



及破正見得聞是經怖畏反戒何以故破戒  
 之人不應於彈指頃住聖人相在袈裟中若  
 聞是經心歡喜者是人名為供養諸佛守護  
 佛道何以故舍利弗是名佛道真際善男子  
 善女人欲得沙門法者為聽是經應過百千  
 万億由旬何以故諸佛如來久乃出世雖  
 於世時乃說之

佛藏經卷第三

念

狎習甲上胡抄撮  
下取楚交反脇虛業反肘知柳

裸郎胡瓦反又陶師  
桃上音坏疋回錠定音刪頭所

反螺就經切諍媽尾覓視鞅央音叛畔音猥烏海

丙 伺

下上 一相  
開俱 音寺  
字妹 司反

嗤 笑

之 上反  
反 尺

涕 零

體 上音

杯

同 上與  
用 孟

憤



